

НАМЗЫРАЙ ЗОЯ

ДИДИМНЕРНИ САКТЫП ЧОР БИС

Тиилелгениң ыры-биле

Эргим ынак төрөөн чурт дээш

Эрес-дидим дайылдашкан

Дидимнерни сактып тур бис.

Ыткан октар дааштап дүшкен

Ыштыг-өрттүг дайын шөлү,

Балыгланган эжин чүктөөн

Маадыр кыстар уттундурбаан.

Кайгамчыктыг тиилелгениң

Хаяаланган үнө чырыын

Эки тура шериглери

Эргеленип уткуп туру.

Каң-шой ок хойлап алган

Калчаа-дерзии дайзындан

Ада-чуртун камгалашкан

Адаларны канчап уттур!

ОН САНИТАР КЫС

Он санитар тыва кыс

Онза күштүг бижиин алгаш,

Дайзыннарга күштүг согул

Даңгыракка адын салган

Ада чурту – ССРЭ дээш

Арат чоннуң дайынынче
Анай-хаак дег чалыы кызын
Аныяк Тыва үдеп турган.
Орус чурттуң делгемнерин
Орук дургаар чарашсынып,
Уян чымчак тыва кыстар
Улам чоргаар болу берген.
Россия улуг чурттуң
Утбалышкы демниг чонун
Саян сынның эзирлери
Чалгын кылып төрелдешкен.
Эрес-дидим тыва кыстар
Эжелекчи дайзыннарга
Эргек чер-даа бастырбас дээш,
Эрлер ышкаш чаалашкан:
Орай дүне октар сыылап,
Онгуларга частып дүжер.
Онкуда эштиң балыын шарып,
Октуг боолуг тулчуп турдуң.
Төрээн чурт дээш демиселге
«Тулчуушкунну» ырлап чорааш,
Дидимнерниң аразында
Тиилелгелиг чанып келдиң.
ӨӨРҮШКҮНҮҢ ӨШПЕС ЧЫРЫЫ
Адаларның эрткен оруу

Алдан чылдың байырында,
Шыдап эрткен Тиилелгени
Шынап канчап сагынмас бис.
Орден-медаль хөрээн каастаан
Оттуг чүрек – маадырларны
Ораннарга марш ырлыг
Омак-хөглүг уткуп тур бис
Дидим-дидим: «Бурунгаар!» – дээн
Тиилелге дээш тулчуушкуннар,
Ыштыг-бустуг дайын шөлү,
Ыткан октар сыылаан даажы...
Тиилелгениң хүнү-биле,
Дидимнерниң ыры-биле
Фронтучу дайынчыга
Боодал чечээм сунуп тур мен.
Тиилелгениң төөгүзүнге
Дириглерге мөгейиивис –
Дайын-чаадан келбээннерни
Даады сактып чоруулуңар.
Маны дашта тураскаалдар –
Маадырларның мөңгө дирии.
Өндүр Улуг Тиилелгевис –
Өөрүшкүнүң өшпес чыры

ТУРАСКААЛ

Алдарлыг хүн Тиилелгениң Майның тозу –
Акыларның аккан ханы, арыг дери –
Аас-кежи, өөрүшкү, хүлүмзүрүг
Ада-чуртка ашпас хүн бооп мөңгө чыраан.
Тыва чоннуң маадырлыг оглу, кызы
Дыңзыды-ла «Тулчуушкунну» ырлап чорааш,
Чалыы Тыва салгакчызы утпас кылдыр –
Чайынналган тураскаалды арттырып каан.
Акы-дунма совет черни хостажыр дээш,
Амыр-дыш чок тулчуп турган дошкун өйде –
Арат оглу дайынчының хевин өттүр
Аар-коргулчун ок өде халаан.
Хөрек база, билет база аттырыпкан
Хөөкүй шагжок эштеринге сымыранган:
«Төрээн чурт дээш кара бажым салып тур мен,
Төрел чон дээш амы-тыным өргүп тур мен».
Чырык черге тураскаал бооп артып калган
Чыда дыынмаан биледиңни тудуп тур бис.
Чөптүг шын дээш тынын берген эживис сээң
Сөглээн сөзүң чүрээвисте шыгжап чор бис.